

## **Galardon di honor pa PCN na premiashon di fondonan di penshun hulandes**

**Fondo di Penshun Hulanda Karibense (PCN) a haña un rekonosimentu di honor den e kategoria ‘Fondo di Penshun di Aña’ durante di entrega di premionan NPN na Amsterdam dia 27 di òktober 2011. Tur aña e revista NPN, un revista independiente ku Financial Times na Londres ta publiká, ta otorgá distinshonnan komo muestra di rekonosementu pa esfuersonan pa mantenéi fortifiká e sistema di penshun na Hulanda.**

A funda PCN na final di 2010 pa defendé e penshunnan di kolaboradónan di gobièrnu (di Reino), di kuido di salú i den enseñansa riba e islanan Bonaire, Saba en St. Eustatius, ku entrante 10 di òktober 2010 ta forma parti di e sistema konstitushonal hulandes. E fondo tin alrededor di 4500partisipante. Su konstelashon so kaba ku partisipantenan partí riba tres isla i un distansha di 800 kilometer ta hasié un fondo úniko. E distribushon geográfiko amplio aki ta pone ku ta nesesario pa hasi uzo efisiente di teknologia.

Danki na esfuerso di gobernantenan lokal i kolaboradónan den kooperashon ku organisashonnan hulandes, Syntrus Achmea ku ta enkargá ku ehekushon di e penshun i e ofisina di maneho Montae, a krea den ménos di un aña un fondo di penshun moderno i bon organisá ku un base finansiero sólido. Un logro tremendo ku a resultá pues den un menshon di honor, ora ku a anunsiá e ‘Fondo di Penshun di aña’. E ganadó den e kategoria aki a resultá PNO Media.

E hurado a keda partikularmente impreshoná pa e manera inteligente ku a organisá PCN. E rapòrt di e hurado ta menshoná: “A traha duru pa realisá e fondo aki. E forma di manehá, e areglo di penshun i su ehekushon ta kuadra ku tur eksigensianan reglamentario. E miembronan di hurado ta elogiá e forma inteligente ku a organisá e fondo, unda ku e sekretario ofishal ta bishitá e doñonan di trabou riba e islanan, ta organisá ora di konsulta pa e penshonadonan i seshonnan di informashon pa tur partidonan di interes. Ku e Menshon di Honor e hurado kier enkurashá PCN pa sigui riba e kaminda aki.”

E fondo tin un direktiva di kuater miembro ku representashon a base di igualdat. Harald Linkels (Bonaire) ta presidente, Bert de Regt (Nederland) ta presidente interino, Valdemar Marcha (Curacao) ta sekretario i Will Johnson (Saba) ta sekretario interino. Komo ku e miembronan di direktiva ta traha for di diferente lugá, e direktiva ta hasi hopi uzo di konferensha ku video i un plataforma di konsulta i dokumentashon elektróniko. Tur komunikashon eksterno ta tuma lugá den tres idioma, hulandes, ingles i papiamentu. Komo ku PCN ta duna hopi balor na promové desaroyo profeshonal, ta kombiná e reunionnan físiko semper ku enkuentronan di formashon.

*Pa mas informashon:*

Zaida Ellis, sekretario ofishal di PCN

Email: [secretaris.PCN@montae.nl](mailto:secretaris.PCN@montae.nl)

Telefon: 00 599 701 91 15.